

Malditu Trabou?

Antes bonerianonan tabata konosí komo bon trahadó. Ainda tin hende ku sa kon pa traha, ma nan ta birando skars. Awor nos ta importá stranhero pasobra nan ta mihó trahadó. Tristu!

Talbes un kambio di mentalidat pa ku trabou a produsí e kambio aki. Maske kada persona tin su propio opinion pa ku trabou, dos punto di bista por resumé tur perspektiva.

1) Tin hende ta haña ku **trabou ta un maldishon**. Ora Adam a hasi piká, Dios a bis'è, “*Maldishoná e tera ta pa bo motibu; ku trabou duru lo bo kome di dje tur e dianan di bo bida...Ku sodó di bo frenta lo bo kome pan, te ora bo bolbe na tera...*” (Gènesis 3:17,19). Pues, segun nan, trabou ta un maldishon.

Algun ta konsiderá trabou un medio indeseá pa yega na plaka. P'esei nan meta ta pa hasi ménos trabou pa mas pago. Pa nan, trabou ta un karga nan tin ku suportá te nan porfin tin edat pa kobra penshon. Otronan ke sa ku hende ta eksistí pa gosa. Trabou ta un maldat nesenario pa fasilidat i finansia e dibertishon.

Si bo tin un perspektiva asina—mirando trabou komo un maldishon—esei lo produsí frustrashon, kansansio, i desanimo. Bo kalidat di trabou lo laga hopi di deseá. No ta importábo kon bon òf kon tiki bo ta traha, basta ku bo por kobra.

2) Ma tin un otro perspektiva: **trabou ta un bendishon**. E persona ku e perspektiva aki, lo mira su empleo for di un punto di bista muchu mas korekto, Dios Su perspektiva!

Beibel ta eksaltá trabou! Maske trabou pisá tabata parti di Dios Su maldishon pa piká di hende, ta importante pa realisá ku Dios a inisiá trabou PROME ku hende a hasi piká. Ora Dios a krea Adam, El a “...*pon'è den hòf di Edén pa kultiv'è i kuid'è*” (Gènesis 2:15). Siendo den un kondishon perfekto, Dios tabata ke pa Adam traha. Ora hende a hasi piká, a bira mas importante pa hende no sinta pornada. Komo resultado Dios a hasi trabou mas pisá. Ta un bendishon ku hende mester traha!

Bo trabou ta un bendishon dirèkt òf indirèkt pa henter e komunidat. Hende ku tin e perspektiva aki, lo tin satesfakshon i alegria pa ku nan trabou. Pues, trabou ta benefisiá e trahadó tambe. En general, hende ku ta traha ta sikológikamente mas salú ku esun ku ta sinta pornada. I nos tur sa ku Beibel tin rason ora e ta bisa ku “*soño di e hòmber trahadó ta dushi...*” (Eklesiastes 5:12).

Ma hopi hende tin un akstitut diskriminatorio pa ku trabou. Nan ke sa un “bon trabou” ta sintando tras di lèsenar den kantor ku èrko. Pa nan, otro empleo ta inferior. Nan ta preferá keda sin traha ku susha man i kansa kurpa ku trabou duru. Segun nan, nan ta meresé mihó!

E mentalidat orguyoso ei ta totalmente kiboká. Pa Dios **tur trabou** (ku no ta violá Su normanan) ta un bendishon i onrado!

Na universidat, mi a traha riba truk di sushi komo parti di mi fakansi djop maske e no tabata algu mi lo a skohe. Ma pa fin di fakansi esei tabata mi trabou favorito. Ora mi a falta sèn pa kubri e gastunan di seminario, mi a haña trabou den e profeshon médiko...limpiendo ròstul i tualèt ku a ser di hür. **Maske kon umilde e por ta, TUR trabou ta un bendishon!**

Nos ke sa ku nos ta mihó ku otro hende **pasobra** nos tin sierto trabou. Esei ta puru mentira! Ta remarkabel ku ora Dios a kana riba mundu, E tabatin ofishi di karpinté (Marko 6:3). Vários di Su apòstelnan tabata piskadó.

Irespekto di bo diplomanan, rikesa, òf puesto, bo tòg ta dependé di mekániko pa drecha outo, mèsla i peon pa konstruí kas, hende pa kohe sushi, èts.

Sinta pornada no ta un bendishon! Trabou no ta un maldishon! Sea bo ta traha ku mashin, ku hende, ku papel, òf ku bo mannan, nunca perdè e perspektiva korekto pa ku trabou—**bo trabou--tur trabou**, ta un bendishon!